

आकाशवाणी जयपुर—अजमेर प्रादेशिक समाचार

दिनांक 18.05.2024

समय: 18.45 बजे

- प्रदेश रा घणखर हलकां मांय लू रो असर—बाड़मेर समेत 8 ठौड़ां पारो 46 डिग्री सेल्सियस ने पार कीनो ।
- लोकसभा चुनाव रा पांचवां दौर सारू प्रचार रो काम आज पूरो व्हयो—49 सीटां सारू 20 मई ने वोट पड़ेला ।
- प्रदेश मांय ब्लड बैंकां रा काम—काज माथे निगराणी राखण सारू ब्लड ट्रांसफ्यूजन सर्विसेज अनुभाग बणायो जावेला ।
- विश्व संग्रहालय दिवस रे मौके आज प्रदेश मांय न्यारा—न्यारा कार्यक्रम राख्यी ज्या ।

000

प्रदेश रा घणखर हलका जबरदस्त गर्मी री फेंट मांय आ गया है, जिण ऊं जिंदगी माथे घणो असर पड़ रह्यो है । राज्य मांय केई ठौड़ां आज पारो 46 डिग्री सेल्सियस ने पार कर ग्यो । बाड़मेर मांय सब ऊं बत्तो 46 दशमलव 9 डिग्री सेल्सियस तापमान दर्ज करी ज्यो । फलौदी मांय 46 दशमलव 4, पिलानी मांय 46 दशमलव 3, जैसलमेर, जालौर, श्रीगंगानगर अर करौली, 46 दशमलव 2 अर फतेहपुर मांय 46 दशमलव 1 दर्ज करी ज्यो । धौलपुर मांय 45 दशमलव 9, जोधपुर मांय 45 दशमलव 8, अन्ता मांय 45 दशमलव 6, कोटा, चूरू अर बीकानेर मांय साढे 45, गंगापुर सिटी मांय 45 दशमलव 3 अर भरतपुर मांय 45 डिग्री सेल्सियस तापमान दर्ज करी ज्यो । दिन सागे रात री बगत ई पारो केई ठौड़ां 30 डिग्री सेल्सियस ऊं ऊंचो दर्ज करी ज्यो । लारली रात कोटा, जैसलमेर, जोधपुर

शहर, जालौर अर धौलपुर मांय कम ती कम तापमान ई 30 डिग्री सेल्सिय ने पार कर ग्यो। फलौदी मांय रात री बगत तापमान 34 दशमलव 6 डिग्री सेल्सियस दर्ज करी ज्यो। जोधपुर मांय गर्मी ऊं बचाव सारू सड़कां माथे पाणी रो छिड़काव कर्यो जा रह्यो है। पेश है म्हाणा खबरनवीस री रपट—

.....

बालोतरा ज़िला मांय ई तापमान 45 डिग्री सेल्सियस ऊं ऊंचो दर्ज करी ज्यो। म्हाणा खबरनवीस बतायो के जोरदार तावड़ा रे कारण बाजार सूना निजर आया।

.....

केकड़ी मांय लोगां ने गर्मी ऊं बचावण सारू आज बस स्टैंड परां ठंडो पाणी अर शरबत पायी ज्यो। ज़िला रा सावर मांय सामाजिक संगठनां री ओर ऊं परिंदां बांटी ज्या अर ढांढा-ढोरां सारू पाणी री खेळियां रखवायी ज्यी। **झालावाड़** ज़िला मांय गौवंश ने तेज गर्मी ऊं बचावण सारू श्री कृष्ण गौशाला मांय ड्रिप कूलिंग सिस्टम अर कूलर लगायी ज्या है। **राजसमंद** ज़िला मांय ई पड़ रह्या जोरदार तावड़ा रे कारण राजसमंद झील, महाराणा प्रताप म्यूजियम, रक्त तलाई, हल्दीघाटी, कुंभलगढ, अर पन्ना धाय म्यूजियम मांय सैलाणियां री तादाद कम रही। **श्रीगंगानगर, भरतपुर, चूरू, शाहपुरा, नीम का थाना अर जालौर** मांय ई घणो ज़बरदस्त तावड़ो पड़ रह्यो है। **टोंक** मांय पशुपालन विभाग तेज़ गर्मी ने ध्यान राखता थकां ढांढा-ढोरां अर परिंदां सारू ई छाया-पाणी री व्यवस्था करण री अपील कीनी है, जद के स्वास्थ्य विभाग बच्चां अर बुजुर्गां ने तावड़ा मांय बाहर नी जावण अर थोड़ी-थोड़ी देर मांय पाणी अर छाछ सरीखी ठंडी चीजां पीवण री राय दीनी है। ज़िला रा देवली मांय अदालत परिसर मांय पंछियां सारू दाणा-पाणी री व्यवस्था बाबत् परिण्डा बांधी ज्या। टोंक मांय स्काउट गाईड री ओर ऊं ई परिण्डा बांधी ज्या। **बाड़मेर** ज़िला मांय ई झुलसा देवण वाळी लू रा थपेडां ऊं मिनखां सागे राष्ट्रीय मरु उद्यान रा जिनावरां ने ई घणी परेशानी व्हे रही है।

वठे सड़कां माथे पाणी रो छिड़काव करी ज्यो। **जैसलमेर** मांय जलदाय विभाग ने पीवण रा पाणी री पूर्ति तैय करावण रा हुकम दिया ज्या है।

दूजी कानी उदयपुर मांय सिंज्या री पोर बिरखा व्हेवण ऊं गर्मी ऊं थोड़ी साता मिली। झालावाड़ मांय ई दोपहरां पाछे कठे-कठे बादळा मण्ड जावण ऊं तावड़ा ऊं थोड़ो आराम मिल्यो। मौसम केंद्र जयपुर रे मुजब आवता दो-तीन दिन अधिकतम तापमान मांय खास बदलाव नी व्हेवण अर लू रो दौर एक सप्ताह तांई चालतो रेहवण रा आसार है। जोधपुर अर बीकानेर संभाग मांय घणखर ठाड़ां अर जयपुर, भरतपुर अर कोटा संभाग रा कुछ हलकां मांय अधिकतम तापमान 45 ऊं 46 डिग्री सेल्सियस रे आरे-सारे रेहवण अर लू बाजण रा आसार है। जोधपुर अर बीकानेर संभाग अर शेखावाटी हलका मांय कठे-कठे ज़ोरदार लू बाजण री शंका है।

0000

लोकसभा चुनाव रा पांचवां दौर मांय प्रचार रो काम आज पूरो व्हे ग्यो। ई दौर मांय उत्तर प्रदेश री 14, महाराष्ट्र री 13, पश्चिम बंगाल री सात, बिहार अर ओडिसा री पांच-पांच, झारखंड री तीन, जम्मू कश्मीर अर लद्दाख री एक-एक सीट सारु 20 मई सोमवार ने वोट पड़ेला। केई ठौड़ां ज़ोरदार गर्मी अर लू री चेतावनी ने ध्यान राखता थकां निर्वाचन आयोग खास इन्तजामात कीना है। ई बीचे लोकसभा चुनाव रा आगला चरणां सारु प्रचार ज़ोर पकड़ रह्यो है।

0000

शाहपुरा ज़िला रा कोटड़ी थाना हलका मांय लारला साल 2 अगस्त ने एक नाबालिग टाबरी ने केई जणां कानी ऊं जबरदस्ती कर्यां पाछे कोयला री भट्टी मांय जीवती बाळ देवण रा मामला मांय आज भीलवाड़ा री पॉक्सो मामलां री अदालत दो खास आरोपितां कालू अर काना ने दोषी करार दीना, जद के सात आरोपितां ने बरी कर दीना।

दोषी अपराधियां ने सोमवार ने सज़ा सुणायी जावेला।

000

चन्द्रभागा नदी री सफ़ाई सारु बून्दी ज़िला रा सथूर गांव मांय खास अभियान चलायो जावेला। ई सारु कार्य योजना बणायी ज्यी है।

वठे गांव वाळां री मदद ऊं नदी रा तळा मांय सफ़ाई करी जावेला अर एनिकट ऊं पाणी रो रिसाव रोकण सारु ज़रूरी प्रबंध कर्या जावेला अर नदी री कोर माथे पौधा रोप्या जावेला ।

000

प्रदेश मांय ब्लड बैंकां ने बेहतर तरीका ऊं चलावण सारु जनस्वास्थ्य निदेशक री निगराणी मांय ब्लड ट्रांसफ्यूजन सर्विसेज अनुभाग बणायो जावेला । ओ अनुभाग राज्य मांय औषधि नियंत्रण विभाग सागे तालमेल कर र ब्लड बैंक ऊं जुड्या कामां मांय साफगोई राखण सारु निगराणी करेला । चिकित्सा विभाग री अतिरिक्त मुख्य सचिव शुभ्रा सिंह आ जाणकारी दीनी । ई बीच जयपुर रा जे.के. लोन अस्पताल मांय प्लाज्मा चोरी रा मामला री जांच सारु बणायी ज्यी समिति आज रपट पेश कर दीनी । शुभ्रा सिंह बतायो के मरीजां ने बिना परेशानी खून मुहैया करावण सारु ब्लड ट्रांसफ्यूजन तंत्र ने मजबूत बणायो जावेला अर ब्लड बैंक ऊं जुड्या सगळा डॉक्टरां अर पैरामेडिकल स्टाफ ने सिखावण दी जावेला । अतिरिक्त मुख्य सचिव बतायो के ब्लड बैंकां माथे बेहतर तरीका ऊं निगराणी राखण सारु ऑनलाइन सॉफ्टवेयर तैयार करायो जावेला, जिण मांय बार कोड आधारित इन्वेंट्री मैनेजमेंट अर सप्लाई सिस्टम व्हेला । ई बीच जयपुर रा जे.के. लोन अस्पताल मांय प्लाज्मा चोरी रा मामला मांय एक गैर सरकारी अस्पताल रे ई भेळा व्हेवण री ठा पड्यां पाछे वां रा ब्लड बैंक री ई जांच करी ज्यी अर वठे गड़बड़ियां मिलण परां अस्पताल ने नोटिस दियो ज्यो है ।

0000

जयपुर ग्रामीण ज़िला रा सुमेल, बस्सी मांय विधिक सेवा प्राधिकरण मेट्रो प्रथम री ओर ऊं विधिक जागरूकता शिविर लगायी ज्यो । शिविर मांय मनरेगा रा तैत मजूरी करण वाळी महिलावां ने कानूनी जाणकारी दीरीजी । प्राधिकरण रा सचिव राजेन्द्र बंशीवाल सामाजिक बुराइयां दूर करण रा बारा मांय ई महिलावां ने जाणकारी दीनी ।

000

जयपुर रा हाथी गांव मांय हाथियां री स्वास्थ्य जांच सारु 20 अर 21 मई ने शिविर लगाया जावेला। सगळा हाथी मालिकां अर महावतां सारु शिविर मांय हाथियां री स्वास्थ्य जांच करावणो ज़रुरी व्हेला। ई बाबत उप वन संरक्षक जगदीश चंद गुप्ता हुकम दीना है।

000

कोटपूतली—बहरोड री ज़िला कलेक्टर कल्पना अग्रवाल शहर रो दौरा कर र साफ—सफाई, पाणी री व्यवस्था व्यवस्था अर सड़कां रा हालात रो जायजो लीनो अर अहलकारां ने जरुरी हुकम दीना। वे मौके मौजूद जनता सागे ई बातचीत कर र समस्यावां सुणी।

000

आज विश्व संग्रहालय दिवस रे मौके राज्य मांय केई कार्यक्रम राख्यी ज्या अर सैलानी सरकारी संग्रहालयां ने मुफ्त मांय निरख्या। ई मौके सवाईमाधोपुर मांय राजीव गांधी क्षेत्रीय प्राकृतिक विज्ञान संग्रहालय मांय सैलानियां रो स्वागत करी ज्यो अर संग्रहालय री ज़रुरत अर ज़रुरी सुधारां रा बारा मांय विचार करी ज्यो। **पाली** रा राजकीय बांगड़ संग्रहालय मांय लोग ब्रिटेन ऊं भारत लायी ज्यी आउवा री सुगाली माता री 10 माथा अर 54 हाथां वाळी देवी री मूरत , सिक्का, जूना असलाह, अर कपड़ा ने निरख्या। **बूंदी** रा राजकीय संग्रहालय सुखमहल मांय संगोष्ठी राख्यी ज्यी, जिण मांय संग्रहालय रा बारा मांय जाग जगावण री ज़रुरत माथे ज़ोर दियो ज्यो। **भरतपुर** मांय ई किला माथे रा संग्रहालय मांय सैलानियां ने मुफ्त प्रवेश दियो ज्यो अर वां रो शहनाई बजा र स्वागत करी ज्यो। सैलानियां ने भरतपुर रा इतिहास री जाणकारी ई दीरीजी। संग्रहालय मांय टाबरां सारु चित्रकला होड़ राख्यी ज्यी। **झालावाड़** मांय पर्यटन विकास समिति री ओर ऊं संग्रहालय कने संगोष्ठी राख्यी ज्यी, जिण मांय जिला री पुरा महत्त्व री धरोहरां ने संभाळ र राखण माथे ज़ोर दियो ज्यो। ई मौके संग्रहालय मांय रख्योड़ी ऐतिहासिक धरोहरां अर जूनी मूर्तियां अर चित्रकारी ने देखण सारु ई लोग पूग्या। **कोटा** मांय हाड़ौती हेरिटेज वॉक राख्यी ज्यी। **जैसलमेर** रा दी थार हेरिटेज म्यूजियम मांय परिचर्चा राख्यी ज्यी।

000